

DIONIČKO DRUŠTVO BH TELECOM  
S A R A J E V O

Prijedlog

## P R A V I L N I K

IZMJENAMA I DOPUNAMA PRAVILNIKA O NABAVKAMA

Sarajevo, Juni/Lipanj 2026. godine

Na osnovu člana 81. stav (1) tačka d) Statuta Dioničkog društva BH Telecom Sarajevo broj: 00.1-03-31535/23-9 od 22.12.2023.godine, Uprava Društva na svojoj \_\_\_\_ sjednici, održanoj \_\_\_\_\_ 2026. godine, d o n o s i

## P R A V I L N I K IZMJENAMA I DOPUNAMA PRAVILNIKA O NABAVKAMA

### Član 1.

U Pravilniku o nabavkama broj: 00.1-14-30750/22-4 od 06.04.2022. godine i broj: 00.1-14-85658/25-2 od 24.09.2025. godine (u daljem tekstu Pravilnik) član 16. stav (1) mijenja se i glasi:  
Pregovarački postupak može biti sa jednim, više ponuđača ili ubrzani pregovarački postupak.

### Član 2.

U članu 17. stav (3) mijenja se i glasi:

Pregovarački postupak sa više ponuđača (sa ili bez objave) se odvija u dvije faze, faza ocjene ponuda i faze pregovora. Nakon faze ocjene ponuda donosi se Odluka o ocjeni ponuda, koja se dostavlja učesnicima u postupku nabavke, nakon čega se nastavlja faza pregovora. U fazi pregovora učestvuju ponuđači i ponude koje su ocijenjene kao prihvatljive prema prethodnoj fazi. Ukoliko se u pregovaračkom postupku sa više ponuđača (sa ili bez objave) zaprimi jedna ponuda, postupak se provodi shodno odredbama pregovaračkog postupka sa jednim ponuđačem.

### Član 3.

Iza člana 17. dodaju se novi članovi 17a. i 17b.

#### Član 17a.

#### Ubrzani pregovarački postupak

(1) Društvo može provesti ubrzani pregovarački postupak nabavke robe u izuzetnim slučajevima poremećaja na tržištu koje je uzrokovalo:

- a) nestašicu roba, opreme, licenci ili rezervnih dijelova koje Društvo nabavlja;
- b) ograničene proizvođačke alokacije;
- c) kratke rokove važenja ponuda ponuđača;
- d) značajne i brze promjene tržišnih cijena;

(2) Nabavka usluga po osnovu stava (1) ovog člana, može se izvršiti ukoliko su iste neodvojive od predmeta nabavke.

(3) Ukoliko postoje razlozi iz stava (1) ovog člana ubrzani pregovarački postupak se provodi kada bi provođenje redovnog postupka nabavke moglo prouzrokovati štetu, **gubitak poslovne prilike** ili nemogućnost pravovremene nabavke, a zbog potrebe obezbjeđenja kontinuiteta poslovanja, stabilnosti sistema i mreže Društva.

(4) Ubrzani pregovarački postupak prvenstveno se provodi sa proizvođačima, autorizovanim partnerima ili ponuđačima koji prema raspoloživim tržišnim informacijama mogu obezbijediti blagovremenu i pouzdanu realizaciju predmetne nabavke.

(5) Društvo će prije pokretanja postupka nabavke izvršiti provjeru i analizu svih kvalifikacionih uslova potencijalnih ponuđača koji se odnose na predmet nabavke, uz postojanje raspoloživih dokaza o poremećaju na tržištu, kao što su:

- a) obavještenja proizvođača, distributera ili dobavljača o poremećajima u isporuci ili nestašici robe;
- b) podaci o rokovima isporuke i uslovima ponude;
- c) potvrde proizvođača o ograničenim proizvođačkim alokacijama odnosno raspoloživim količinama robe;
- d) relevantna e-mail komunikacija;
- e) tržišne analize i drugi relevantni dokazi.

(6) U ubrzanom pregovaračkom postupku Društvo će:

- a) skratiti rokove za dostavu ponuda, pregovora
- b) zaprimiti ponudu elektronskim putem;
- c) pregovore provoditi elektronskim putem;
- d) pojednostaviti administrativne zahtjeve koji nisu od suštinskog značaja za predmetnu nabavku.

(7) U ubrzanom pregovaračkom postupku dokumentacija zahtijevana u ponudi je:

- a) dostavljanje originala ili kopije izvoda iz sudskog registra, čiji datum izdavanja nije stariji od šest mjeseci od dana dostavljanja ponude ukoliko je kandidat ponuđač domaće pravno lice, odnosno original ili kopiju rješenja nadležne službe za upravu odnosno dostavljanje originala ili kopije dokumenata kojima se dokazuje registracija u relevantnim profesionalnim ili drugim relevantnim registrima zemlje inostranog ponuđača čiji datum izdavanja nije stariji od šest mjeseci od dana dostavljanja ponude, odnosno dokument u kojem je navedeno/iz kojeg proizilazi da isti važi za period duži od dana dostavljanja ponude, a kojim se dokazuje obavljanje odgovarajuće profesionalne djelatnosti ;
- b) izjavu ovjerenu kod nadležnog organa kojom potvrđuje da:
  - uredno izmiruje obaveze po osnovu poreza, doprinosa i drugih zakonom propisanih davanja;
  - nije insolventan niti ima blokirane račune koji bi mogli uticati na realizaciju ugovornih obaveza;
  - ispunjava uslove profesionalne, tehničke i finansijske sposobnosti za realizaciju predmetne nabavke;
  - raspolaže svim potrebnim ovlaštenjima, autorizacijama i pravima neophodnim za realizaciju nabavke.

(8) Ukoliko tržišne okolnosti dozvoljavaju, poziv za dostavu ponuda može se uputiti prema više ponuđača.

(9) U slučajevima kada postoji rizik gubitka proizvođačke alokacije, raspoloživosti robe ili isteka roka važenja ponude, Društvo može izvršiti rezervaciju predmeta nabavke, prihvatanje ponude prije formalnog izdavanja narudžbe ili zaključenja ugovora.

### **Član 17b.**

#### **Provođenje ubrzanog pregovaračkog postupka**

- (1) Ponude se razmatraju i ocjenjuju u skladu sa zahtjevima/uslovima iz poziva za dostavu ponuda i tenderske dokumentacije.
- (2) Kod ubrzanog pregovaračkog postupka sa jednim ponuđačem pregovara se o tehničkim, ekonomskim, pravnim i drugim aspektima ugovora s ciljem postizanja ekonomski najpovoljnije ponude za Društvo.
- (3) Kod ubrzanog pregovaračkog postupka nakon prijema ponuda, vrši se analize kvalifikacionih uslova ponuđača koji su dostavili ponudu. Nakon analize ponuda, upućuju se pozivi za pregovore. U fazi pregovora učestvuju ponuđači i ponude koje su ocijenjene kao prihvatljive.

- (4) Kod ubrzanog pregovaračkog postupka sa više ponuđača pregovara se o tehničkim, ekonomskim, pravnim i drugim aspektima nabavke i na osnovu rezultata održanih pregovora, pozivaju se ponuđači da podnesu svoje konačne ponude, koje se otvaraju javno u prisustvu pozvanih ponuđača i među njima određuje prvorangirani ponuđač u skladu sa definisanim kriterijem za dodjelu ugovora.
- (5) U ubrzanom pregovaračkom postupku, tokom postupka pregovaranja, tehnička specifikacija kao sastavni dio TD može biti podložna promjenama.
- (6) Kod ubrzanog pregovaračkog postupka sa više ponuđača, svakom od ponuđača se dostavlja isti sadržaj TD, a pregovori se vode sa svakim ponuđačem odvojeno.
- (7) Kod ubrzanog pregovaračkog postupka sa više ponuđača ugovor se može dodijeliti/zaključiti ako je dostavljena i samo jedna ponuda koja je u skladu sa zahtjevima/uslovima iz poziva za dostavu ponuda i TD. Nakon otvaranja konačnih ponuda sačinjava se Odluka o dodjeli ugovora/poništenju postupka.“

#### Član 4.

Naslov člana 21. mijenja se i glasi:

Nabavka terminalne opreme i robe za dalju prodaju, ostalih roba i/ili materijala.

Tekst člana 21. Mijenja se i glasi:

“Nabavka terminalne opreme **za realizaciju širokopoljasnih usluga** i robe za dalju prodaju, ostalih roba i/ili materijala.”

#### Član 5.

Naslov člana 22. mijenja se i glasi:

Prva faza nabavke terminalne opreme **za realizaciju širokopoljasnih usluga**, robe za dalju prodaju, kao i ostalih roba i/ili materijala.

#### Član 6.

Naslov člana 23. mijenja se i glasi:

*Druga faza nabavke terminalne opreme za realizaciju širokopoljasnih usluga i robe za dalju prodaju ostalih roba i/ili materijala.*

U članu 23. stav (4) mijenja se i glasi:

(4) Za nabavku terminalne opreme za realizaciju širokopoljasnih usluga pozivi za dostavljanje ponuda se upućuju ponuđačima koji imaju certificirane uređaje.

Iza stava (4) dodaju se novi stavovi (5) i (6) koji glase:

(5) Postupak nabavke se okončava u skladu sa odredbama člana 51. ovog Pravilnika.

(6) Kriterij za dodjelu narudžbe se navodi u pozivu za dostavu ponude.

Dosadašnji stav (5) postaje stav (7) i isti se mijenja i glasi:

(7) U slučaju da je ponude dostavilo više zainteresovanih ponuđača, iste se otvaraju u prisustvu predstavnika ponuđača, te se odmah obavljaju **tri iteracije**, a sve u cilju poboljšanja

ponuđenih uslova. U slučaju da je zaprimljena jedna ponuda obaviti će se pregovori. Narudžba se dodjeljuje ponuđaču koji je dostavio najpovoljniju ponudu u skladu sa zadatim kriterijem. Društvo nije obavezno izdati narudžbu.

#### **Član 7.**

U članu 25. stav (15) mijenja se i glasi:

U slučaju nabavke kućnih instalacija i/ili interventnih zahvata i/ili redovnog održavanja narudžbe se izdaju na duži vremenski period, a u okviru kojih se izdaju nalozi za realizaciju pojedinačnih lokacija.

#### **Član 8.**

U članu 26. iza stava (2) dodaje se novi stav (3) koji glasi:

(3) Društvo može u TD za izdavanje narudžbe predvidjeti model izdavanja više narudžbi za više ponuđača koji su ponudili najveće popuste, a prema formuli utvrđenoj u TD koja odražava procentualno učešće popusta u ukupnoj vrijednosti narudžbe. Model izdavanja više narudžbi vršit će se proporcionalno ostvarenom popustu, pri čemu pravo na raspodjelu ostvaruju isključivo ponuđači koji su ponudili popust veći od 0%. Model izdavanja više narudžbi između više ponuđača primjenjuje se isključivo u slučaju postojanja najmanje dvije prihvatljive ponude sa iskazanim popustom. U suprotnom, Društvo može izdati narudžbu jednom ponuđaču u skladu sa odabranim kriterijem ili poništiti postupak nabavke.

Dosadašnji stav (3) postaje stav (4).

U članu 26. poslije stava (7) dodaje se novi stav (8) koji glasi:

(8) U slučaju da se postupak nabavke provedenog u skladu sa II fazom nabavke radova nakon drugog puta ne uspije okončati izborom ponuđača zbog nedostavljanja ponude, a procijenjena vrijednost nabavke ne prelazi 30.000,00 KM (bez PDV-a), Društvo može provesti nabavku putem odgovarajućeg postupka iz člana 10. stav 1. tačka a),b),c),d),g) u skladu sa odredbama ovog Pravilnika.

#### **Član 9.**

U članu 27. stav (2) mijenja se i glasi:

Ukoliko se odabere princip projekta-ugovora o građenju „ključ u ruke“, kao postupak nabavke može se provesti u okviru bilo kojeg postupka nabavke predviđenog ovim Pravilnikom, u zavisnosti od prirode i vrijednosti nabavke.

#### **Član 10.**

U članu 32. dodaje se novi stav (7) koji glasi:

(7) U slučaju ubrzanog pregovaračkog postupka, rok za prijem ponuda u pravilu ne može biti duži od tri dana od datuma slanja poziva za ponudu.“

#### **Član 11.**

U članu 37. stav (1) mijenja se i glasi:

Društvo može, a u zavisnosti od odabranog postupka nabavke, prilikom ocjene ponuda zahtijevati od ponuđača dodatna pojašnjenja koja će pomoći pri pregledu i vrednovanju ponuda, a što se primjenjuje i na dopune ponuda.

U članu 37. iza stava (2) se dodaje novi stav (3) koji glasi:

(3) Ponuđač ima mogućnost da uz odgovor na pojašnjenje priloži dokumentaciju koja se odnosi na postavljeni upit.

Dosadašnji stav (3) postaje stav (4).

### **Član 12.**

U članu 38. stav (2) mijenja se i glasi:

Ukoliko je više ponuđača u situaciji iz prethodnog stava, otklanjanje nedostataka je moguće izvršiti po istom osnovu jednom po fazi postupka.

### **Član 13.**

Iza člana 41. dodaje se novi član 41a. koji glasi:

#### **Član 41a.**

##### **Podugovaranje**

- (1) Ponuđač može dio ugovornih obaveza realizovati putem podugovarača, ukoliko je to predviđeno TD, ponudom te odobreno od strane Društva.
- (2) Ponuđač je dužan u ponudi navesti: naziv podugovarača i dio ugovornih obaveza koji namjerava podugovoriti.
- (3) Ponuđač ostaje u potpunosti odgovoran Društvu za izvršenje ugovora, bez obzira na angažovanje podugovarača. Ponuđač je odgovoran za profesionalnu i tehničku osposobljenost podugovarača potrebnu za realizaciju dijela ugovora koji se podugovara.
- (4) Naknadno angažovanje ili zamjena podugovarača mogući su samo uz prethodnu pisanu saglasnost Društva.
- (5) Društvo može izvršiti provjeru kvalifikacija podugovarača u skladu sa odredbama TD, u kojem slučaju je ponuđač dužan dostaviti dokumentaciju u skladu sa zahtjevom Društva.
- (6) Društvo zadržava pravo odbiti predloženog podugovarača ukoliko isti: ne ispunjava uslove iz stava (6) ovog člana, ima negativna iskustva u realizaciji ugovora, nalazi se na listi nepodobnih ponuđača i predstavlja sigurnosni, operativni ili reputacioni rizik za Društvo. Društvo može odbiti predloženog podugovarača ukoliko procijeni da je podugovaranje prekomjerno u odnosu na ugovorne obaveze ponuđača na način da se podugovaranjem gubi svrha ponuđača kao ugovorne strane. Izuzev u slučaju iz stava (5) ovog člana Društvo će u toku analize ponude obavijestiti ponuđača o prihvatljivosti predloženog podugovarača.
- (7) Za poslove koji uključuju pristup informacionim sistemima, mreži, povjerljivim podacima ili kritičnoj infrastrukturi Društva, Društvo može ograničiti ili zabraniti podugovaranje, a što se određuje TD.“

### **Član 14.**

U članu 42. stav (1) tačka b) mijenja se i glasi:

b) dostavljanje originala ili kopije dokumenata kojima se dokazuje registracija u relevantnim profesionalnim ili drugim relevantnim registrima zemlje inostranog ponuđača čiji datum izdavanja nije stariji od šest mjeseci od dana dostavljanja ponude odnosno dokument u kojem je navedeno/iz kojeg proizilazi da isti važi za period duži od dana dostavljanja ponude (ukoliko se radi o inostranom dobavljaču), a kojim se dokazuje obavljanje odgovarajuće profesionalne djelatnosti.

U članu 42. iza stava (1) dodaje se novi stav (2) koji glasi:

(2) Ukoliko dostavljena dokumentacija za inostrane ponuđače u skladu sa stavom (1) tačka b) ovog člana, nije izdata na engleskom jeziku, ista treba biti prevedena na jedan od službenih

jezika u Bosni i Hercegovini ili na engleski jezik. Prevod mora biti sačinjen od strane ovlaštenog sudskog tumača.

#### **Član 15.**

U članu 43. stav (1) tačka b) mijenja se i glasi:

b) Za inostrane ponuđače: dokaz je dokument koji izdaje nadležni organ u zemlji u kojoj je isti registrovan (original ili kopija), ne stariji od šest mjeseci od dana dostavljanja ponude odnosno dokument u kojem je navedeno/iz kojeg proizilazi da isti važi za period duži od dana dostavljanja ponude.

U članu 43. iza stava (1) dodaje se novi stav (2) koji glasi:

(2) Ukoliko dostavljena dokumentacija za inostrane ponuđače u skladu sa stavom (1) tačka b) ovog člana, nije izdata na engleskom jeziku, ista treba biti prevedena na jedan od službenih jezika u Bosni i Hercegovini ili na engleski jezik. Prevod mora biti sačinjen od strane ovlaštenog sudskog tumača.

#### **Član 16.**

U članu 44. stav (1) tačka b) mijenja se i glasi:

b) Za inostrane ponuđače dokaz je dokument koji izdaje nadležni organ u zemlji u kojoj je isti registrovan (original ili kopija), ne stariji od šest mjeseci od dana dostavljanja ponude odnosno dokument u kojem je navedeno/iz kojeg proizilazi da isti važi za period duži od dana dostavljanja ponude.

U članu 44. iza stava (1) dodaje se novi stav (2) koji glasi :

(2) Ukoliko dostavljena dokumentacija za inostrane ponuđače u skladu sa stavom (1) tačka b) ovog člana, nije izdata na engleskom jeziku, ista treba biti prevedena na jedan od službenih jezika u Bosni i Hercegovini ili na engleski jezik. Prevod mora biti sačinjen od strane ovlaštenog sudskog tumača.

#### **Član 17.**

U članu 48. iza stava (1) dodaje se novi stav (2) koji glasi:

(2) U slučaju da je prvorangirana prihvatljiva ponuda vrijednosti do i uključujući 10.000,00 KM (bez PDV-a) ponuđač neće biti u obavezi dostavljati bankarsku garanciju za dobro izvršenje posla.

Stav (4) mijenja se i glasi:

U slučaju da se vrši nabavka usluga čiji je period realizacije tri dana ili kraći, od ponuđača se neće tražiti dostavljanje garancije za dobro izvršenje posla, kao i za postupke nabavke reklamno promotivnih usluga/propagandnih usluga bez obzira na period realizacije.“

Dosadašnji stavovi (2) i (3) postaju (3) i (4), a stavovi (5) do (7) postaju (6) do (8).

#### **Član 18.**

U članu 51. stav (1) tačka a) mijenja se i glasi:

Postupak nabavke se okončava:

a) izdavanjem narudžbe/i ili zaključenjem ugovora.

U članu 51. iza stava (2) dodaje se novi stav (3):

(3) U slučaju da nijedna ponuda nije dostavljena u određenom krajnjem roku za dostavljanje ponuda, Društvo može produžiti rok za dostavljanje ponuda, objavljivanjem izmjene obavještenja u roku od 7 dana od dana isteka roka za dostavu ponude. Društvo može pored roka za dostavljanje ponude, izmijeniti tendersku dokumentaciju u dijelu za koje utvrdi da je mogao uticati na razloge nedostavljanje ponuda.“

Stavovi (3) i (4) postaju stavovi (4) i (5).

#### **Član 19.**

U članu 58. stav (1) mijenja se i glasi:

Društvo zadržava pravo da u ugovoru o nabavci roba ili usluga u toku realizacije poveća ili smanji ugovorene količine iz obrasca za cijenu ponude do +/-10% bez promjene jediničnih cijena na više, uz zaključenje aneksa sa dobavljačem sa kojim je zaključen osnovni ugovor, uz mogućnost pregovora o cijeni, bez provođenja postupka nabavke.

Iza stava (1) dodaje se novi stav (2) koji glasi:

(2) Ugovor se može aneksirati i u slučaju povećanja ili smanjenja ugovorenih količina, kapaciteta, obima ugovorenih usluga, ukoliko je takva mogućnost predviđena tenderskom dokumentacijom i osnovnim ugovorom, bez promjene jedinične cijene na više i do +/- 10% vrijednosti ugovora, bez provođenja postupka nabavke.

#### **Član 20.**

Iza člana 58. dodaje se novi član 58a. koji glasi:

##### **Član 58a.**

##### **Promjena ugovorene cijene usljed tržišnih poremećaja**

(1) Izmjena ugovorene cijene može se odobriti radi očuvanja principa jednake vrijednosti uzajamnih davanja ugovornih strana, u slučaju nastupanja vanrednih, objektivno dokazivih i tržišno značajnih okolnosti koje imaju direktan uticaj na troškove izvršenja ugovora i koje ugovorna strana nije mogla razumno predvidjeti niti izbjeći u trenutku zaključenja ugovora.

(2) Izmjena ugovorne cijene može se odobriti u slučaju tržišnog poremećaja koji direktno utiče na nabavnu cijenu i mogućnost realizacije ugovora, uz dostavljanje relevantnih i provjerljivih dokaza (tržišni izvještaji relevantnih analitičkih kuća ili specijalizovanih platformi i baza podataka, objavljeni statistički pokazatelji i dr.).

(3) Promjena cijene može se odobriti isključivo za neizvršeni dio ugovora na koji predmetne okolnosti direktno utiču i samo za stvarno dokazano povećanja cijene.

(4) Ukupno povećanje ugovorene cijene po ovom osnovu ne može preći 30% vrijednosti ugovora bez provođenja novog postupka nabavke i posebne saglasnosti Uprave Društva.

(5) Izmjena ugovora u smislu stava (4) ovog člana nije moguća ako je riječ o povećanju cijena do 5% vrijednosti prvobitnog ugovora robe i usluga, odnosno do 10% vrijednosti prvobitnog ugovora o nabavci radova. Povećanje cijene se može zahtijevati samo za razliku u cijeni koja prelazi 5%, odnosno 10% do 30% u skladu sa stavom (4) ovog člana.

(6) Društvo zadržava pravo:

- a) odbiti zahtjev za promjenu cijene ukoliko dostavljeni dokazi nisu dostatni i valjani;
- b) izvršiti tržišnu provjeru i zatražiti dodatna pojašnjenja;

(7) Odluku o prihvatanju ili odbijanju zahtjeva za promjenu cijene donosi Uprava Društva.

(8) Ponuđač je dužan nastaviti izvršenje ugovora do donošenja odluke Društva po podnesenom zahtjevu, osim ukoliko to objektivno nije moguće.

(9) Odobrena promjena cijene reguliše se aneksom ugovora.“

### **Član 21.**

U članu 59. iza stava (4) dodaje se stav (5) koji glasi:

(5) Kod ubrzanog pregovaračkog postupka sa više ponuđača, prigovor ponuđača je dozvoljen na TD i odluku o dodjeli ugovora/poništenje postupka.

Dosadašnji stavovi od (5) do (9) postaju stavovi (6) do (10).

### **Član 22.**

Član 60. stav (4) mijenja se i glasi:

Uvid se može izvršiti samo u dijelu ponude koji predmetni ponuđač nije označio kao povjerljive informacije, u skladu sa odredbama TD i članom 29. stav (2). Uvid u dijelove ponude se dozvoljava u zavisnosti od faze postupka u kojem se uvid zahtjeva. Na zahtjev ponuđača, komisija može odobriti kopiranje ili fotografisanje predmeta uvida što će biti uneseno u zapisnik o uvidu.

U članu 60. iza stava (5) dodaje se novi stav (6) koji glasi:

6) Zahtjev za uvid u ponude kod ubrzanog pregovaračkog postupka se može izvršiti u roku od 1 dana od prijema odluke o dodjeli ugovora/poništenje postupka. Uvid će se omogućiti bez donošenja posebne Odluke u roku od 1 dana od dana zaprimanja zahtjeva, o čemu će se sačiniti zapisnik, a uz prisustvo komisije za nabavke.

### **Član 23.**

U članu 61. iza stava (2) dodaje se novi stav (3) koji glasi:

(3) Prigovor na TD u ubrzanom pregovaračkom postupku sa više ponuđača podnosi se u roku od 1 dana. Prigovor na odluku o dodjeli ugovora/poništenju postupka podnosi se u roku od 1 dana od prijema ovakve odluke, odnosno u roku od 1 dana od izvršenog uvida u ponude ponuđača.

### **Član 24.**

Član 63. Pravilnika mijenja se i glasi:

- (1) Lista nepodobnih ponuđača predstavlja listu subjekata kojima neće biti omogućeno da učestvuju u postupcima nabavke koje provodi Društvo.
- (2) Listu nepodobnih ponuđača utvrđuje Uprava Društva, po potrebi u slučaju saznanja okolnosti iz člana 64. odnosno u slučaju sticanja uslova za brisanje sa liste.
- (3) Objava na web stranici Društva će se realizovati najkasnije narednog radnog dana od dana utvrđivanja Liste
- (4) Ponude ponuđača koji se nalaze na objavljenoj listi nepodobnih ponuđača, na datum krajnjeg roka za dostavljanje ponuda, neće biti razmatrane i bit će vraćene ponuđaču.“

### **Član 25.**

U članu 64. stav (1) tačka a) mijenja se i glasi:

a) koje je Društvo podnijelo tužbu nadležnom sudu po osnovu realizacije okvirnog ugovora/ugovora o nabavci/narudžbe. Odredbe ove tačke su na snazi do okončanja sudskog spora. Odredbe ovog stava ne mogu se primjenjivati s ciljem diskriminacije i nejednakog tretmana ponuđača.

U članu 64. stav (1) tačka b) podtačka 2. mijenja se i glasi:

- odbili potpisati dodijeljeni ugovor i/ili narudžbu, a prije isteka opcije ponude.

U članu 64. stav (3) mijenja se i glasi:

(3)Ponuđaču/ponuđačima koji se nalaze na listi neće biti omogućeno da učestvuje/učestvuju u postupcima nabavke koje provodi Društvo na period od 12 mjeseci od momenta objave ažurirane Liste na web stranici Društva, osim ako se radi o dokazanim slučajevima više sile.

### **Član 26.**

U članu 65. iza stava (1) dodaje se stav (2) koji glasi:

(2)Izuzetno od stava (1) ovog člana, u slučaju hitne nabavke ili kada istraživanje tržišta pokaže da nije moguće obezbijediti drugog ponuđača, Društvo može omogućiti učešće konkurentskom subjektu za nabavke do 8.500,00 KM bez PDV-a, uz obrazloženo odobrenje izvršnog direktora nadležnog za predmetnu nabavku.

Dosadašnji stavovi (2) do (5) postaju stavovi (3) do (6).

### **Član 27.**

Pravilnik o izmjenama i dopunama Pravilnika o nabavkama, stupa na snagu osmog dana od dana objavljivanja na oglasnoj ploči u sjedištu Društva.

Broj: 00.1-14-46015/26

Sarajevo, \_\_\_\_\_

GENERALNI DIREKTOR

Amel Kovačević

Pravilnik o izmjenama i dopunama Pravilnika o nabavkama objavljen je na oglasnoj ploči u sjedištu Dioničkog društva BH Telecom Sarajevo dana \_\_\_\_\_ 2026. godine.

SEKRETAR DRUŠTVA

Senaid Topuz, dipl. iur.